



Sambanwá

GIYA SA PAGESAMBA KAN BANWAAN NIN DIOS

SOLEMNIDAD KAN INMACULADA CONCEPCION NI SANTA MARIANG VIRGEN
08 DICIEMBRE 2022 • PUTI

RITO SA PAGPOÓN

Pataratara

C — Pinagencelebrar ninto an solemnidnd kan Inmaculada Concepcion bilang banwaan na namoot ki Virgen María. Nagtutubod kita an saiyang ina na si Santa Ana ipinangidam siya na mayong digtâ nin kasâlan. Ini nin huli ta si Virgen María iyo an magigin Ina ni Jesus. Sa espiritu nin kapakumbabaan kita gabos magdolok asin mag-arang sa Diós na lugod itugot niya sa satuyang mga gawe-gawe an kabinian ni María, sa satuyang puso an saiyang pagkamoot, asin sa satuyang pagka-tawo an saiyang dakulang pagtubod sa Amâ.

Antifona sa Paglaog

(Is 61, 10) (Tindog)
(Sinambit kun mayo nin Awit sa Paglaog)

Tunay na mag-oogma ako sa Kagurangnan, asin magrorokyaw an sakong kalag sa sakong Diós; ta binadoan niya ako kan gubing nin kaligtasan, asin pinatos niya ako kan manto nin katanosan, siring sa esposang pinagayon kan saiyang mga alahas.

Pagpangurus asin Pagtaong-galang

P — Sa ngaran kan Amâ, asin kan Akî, asin kan Espiritu Santo.

B — Amen.

P — An Kagurangnan mapa-saindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

P — Ika na sinugo sa pagpaomay kan mga nagsosolsol: Kagurangnan, maherak ka.

B — Kagurangnan, maherak ka.

P — Ika na nagdigdi sa pag-apod kan mga parakasala: Cristo, maherak ka.

B — Cristo, maherak ka.

P — Ika na nagtutukaw sa tóo kan Amâ sa pagsurog samo: Kagurangnan, maherak ka.

B — Kagurangnan, maherak ka.

P — Maherak man lugod sato an Diós na makakamhan asin,

pakapatawada an satong mga kasâlan, darahon kita sa buhay na daing kasagkoran.

B — Amen.

Kamurawayan

Gabos — Kamurawayan sa Diós sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangnan na Diós, Hadeng langitnon, Diós Amang makakamhan. Kagurangnan Aking Bogtong, Jesu Cristo, Kagurangnan na Diós, Cordero kan Diós, Aki kan Amâ, ika na nagpaparâ kan mga kasâlan kan kinaban, kaheraki kami; ika na nagpaparâ kan mga kasâlan kan kinaban, akoa an samong pakimaherak; ika na nagtutukaw sa too kan Amâ, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Diós Amâ. Amen.

Colecta

P — Mamibi kita.

O Diós, na huli kan daing-digtang Pangidam ki Virgen María, nag-andam ka nin maninigong eerokan para sa saimong Aki, namimibi kami na mantang linigtas mo siya sa gabos na digtâ, huli kan pagkagadan kan saimo man sanang Akî, na bâgo pa, saimo nang aram, huli kan saiyang pamibi, kami man na nalinigan warasan na makaabot saimo. Huli ki Jesu Cristong Kagurangnan ni amo, saimong Aki, na kaiba mong nabubuhay asin naghahade, kasarô kan Espiritu Santo, Diós, sa gabos na kapanahonan kan mga panahon.

B — Amen.

LITURGIA KAN TATARAMON

Enot na Babasahon (Tukaw)
(Genesis 3, 9-15. 30)

Ipinapasabot sa enot na babasahon an pagkamaheherakon kan Diós. Nagkasalâ si Adan asin si Eva, yaon an saiyang pagkastigo alagad nin huli kan saiyang pagkamoot asin pagkaherak nanuga siya kan kaligtasan para sa katawohan. Naiwaras an kaligtasan ni huli kan bâgong Adan — si Cristo, asin man kan bâgong Eva — si Virgen María.

Pagbasa sa Libro nin Genesis

Nag-apod an KAGURANGNAN Diós sa tawo, asin nagsabi saiya: "Haen ka?" Nagsimbag: "An saimong tingog nadadangog ko sa saimong tatamnan: natakot ako, huli ta huba ako, nagtago." Nagsabi: "Siisay nagsabi saimo na huba ka? Sa kahoy na ibinawal ko saindo an pagkakan nagkakan ka?" Nagsabi si Tawo: "An babae na itinaid mo sako, siya an tuminao sako kan hale sa kahoy asin ako kuminakan." Nagsabi an KAGURANGNAN Diós sa babae: "Ano ining ginibo mo?" Nagsimbag an babae: "An halas, dinaya ako asin ako nagkakan." Kaya nagsabi an KAGURANGNAN Diós sa halas: "Huli ta ginibo mo ini, maldito ka sa gabos na hayop asin sa gabos na nabubuhay sa lantad! Sa saimong tulak ika maglalakaw asin alpog an kakakanon mo sa gabos na aldaw kan saimong pagkabuhay. Papag-iwalon ko kamo: ika asin an Babae, an saimong tinubò asin an saiyang tinubò; tatamakan ka kaini sa saimong payo, ika na minatukwag kan saiya sa bool." Nginarannan kan Tawo si saiyang agom Eva, huli ta siya an inâ kan gabos na buhay.

Tataramon kan Kagurangnan.

Gabos — Salamat sa Dios.

Salmo Responsorio

(Salmo 98, 1. 2-3. 3-4)

S — Mag-awit sa Kagurangnan nin bâgong awit huli ta guminiibo siya nin mga ngangalasan.

1. Mag-awit sa KAGURANGNAN nin bâgong awit, huli ta naggibo siya nin mga ngangalasan. Nanligtas para saiya an tóo niya, asin an banal niyang takyag. (S)

- Ipinamidbid kan KAGURANGNAN an saiyang pagliligtas, sa mga mata nin mga nación ihinayag an saiyang kasuripotan. Giniromdom niya an karahayan niyang boót asin an saiyang katotoohan sa harong nin Israel. Nahiling kan gabos na poró kan dagâ, an pagliligtas kan satong Diós. (S)
- Nahiling kan gabos na poró kan dagâ, an pagliligtas kan satong Diós. Magpatara-tara sa KAGURANGNAN, bilog na dagâ, magbulwang nin kaogmahan, magkurahaw asin magtugtog! (S)
- Magtugtog sa KAGURANGNAN sa arpa, sa arpa asin sa tingog nin awit; sa mga trompeta asin tanog nin hamudyong Magaya-gayang mag-awit sa atubang kan hade, an KAGURANGNAN. (S)

Ikaduwang Babasahon

(Efeso 1, 3-6. 11-12)

Poon sa kapinônan yaon na kitang mga tawo sa isip nin Diós. Kun kaya kaibahan kita sa saiyang plano min kalistasan. Ini totoo orog nang gayo ki María na piniling magin Inâ kan satong Paratubos. Ngonian inalok kita na magpasalamat sa Diós sa gabos na mga biyaya na iwinaras niya sato ki Cristo.

Pagbasa sa Surat ni San Pablo sa mga taga-Efeso

Pablo, apostol ni Cristo Jesus sa bagsik kan boót kan Diós. Sa mga banal na yaon (sa Efeso) asin maimbod ki Cristo Jesus. Mapa-saindo an gracia asin katoninongan hale sa Diós na satong Amâ asin ki Jesu Cristong Kagurangnan. Pag-omawon an Diós, Amâ kan Kagurangnan tang si Jesu Cristo! Siya na iyo an nagbendicion sato kan gabos na espiritual na bendicion sa mga langitnon, ki Cristo! Pinili niya kita sa saiya bâgo tugdason an kinâban, na magin banal asin mayong digtâ sa atubang niya, sa pagkamoot; itinalaan niya kita kan enot pa, para sa kamugtakan nin akî huli ki Jesu Cristo para saiya, susog, sa pagmarhay kan saiyang boót, para sa kaomawan kan kamurawayan kan saiyang gracia, na iwinaras satuya sa saiyang namomotan. Sa saiya nagkapalad man kita na mapili, kita na itinalaan kan enot pa, susog sa plano kan nagpapahimo kan gabos susog sa hatol kan saiyang boót, tanganing mapa sa kaomawan kita kan saiyang kamurawayan, kitang enot na nagka-igwang paglaom ki Cristo.

Tataramon kan Kagurangnan.

Gabos — Salamat sa Dios.

Pagrokyaw

(Lucas 1, 38) (Tindog)
(Sinambit kun dai inawit an Alleluia)

Allelúia, allelúia! Paglaos, nagsabi saiya: “Mag-ogma, panô nin gracia, kaiba mo an Kagurangnan.” Allelúia, allelúia!

Evangelio

(Lucas 1, 26-38)

P — An Kagurangnan mapa-saindo.

B — **Asin sa saimong espiritu.**

P — ✠ Pagbasa kan banal na Evangelio susog ki **San Lucas.**

B — **Kamurawayan saimo, Kagurangnan.**

Ika-anom na bulan, sinugo kan Diós an angel na si Gabriel sa sarong ciudad nin Galilea na an ngaran Nazaret, sa sarong virgen na esposa nin sarong lalaki na an ngaran José, sa harong ni David; asin an ngaran kan virgen, María. Paglaog, nagsabi saiya: “Mag-ogma, panô nin gracia, kaiba mo an Kagurangnan!” Sa mga tataramon na ini napurisaw siyang gayo, asin nagparahorop-horop kun ano kaya ining pataratará. Nagsabi saiya an angel: “Dai ka matakot, María; ta nagkamit ka nin gracia sa Diós. Uya, mangingidam ka asin mangangaki nin lalaki, na ngangaranan mong Jesus. Ini magigin dakula, asin aapodon na Aki kan Orog kahalangkaw. Itatao saiya kan Kagurangnan Diós an trono ni David na saiyang amâ; mahade siya sa harong ni Jacob sagkod pa man; asin an saiyang kahadean mayo nin katapusan.” Nagsabi si María sa angel: “Pâno iyan mangyayari ta mayo akong namimidbidan na lalaki?” Nagsimbag saiya an angel: “Sasangkoban ka kan Espiritu Santo asin lilindongan kan kapangyarihan kan Orog kahalangkaw: kaya an mamumundag aapodon na Banal, Akî kan Diós. Uya, si Elizabeth na saimong pinsan, siya man nangidam sa saiyang pagkagurang, asin an bulan na ini iyo an ika-anom kaining inaapod na baog; huli ta mayo ni anong imposible sa Diós.” Nagsabi si María: “Uya, an surogoon kan Kagurangnan; mangyari sakuya susog sa saimong itinaram. Asin naghale saiya si angel.

P — Marahay na Bareta kan Kagurangnan.

B — **Pag-omaw saimo Cristo.**

Homilia (Tukaw)

Pagrokyaw kan Pagtubod (Tindog)

Credo Niceno-Constantinopolitano

Gabos — Nagtutubod ako sa sarong Diós Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Diós, asin namundag gikan sa Amâ bago kan gabos na panahon. Diós na gikan sa Diós, ilaw na gikan sa ilaw, totoong Diós na gikan sa totoong Diós, ipinangaki, dai linalang, sarô sa pagka-Diós sa Amâ: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(Sa mga minasunod na tataramon, abot sa asin nani-tawo, an gabos minaduko.)

Asin nani-laman huli kan Espiritu Santo ki Virgen María, asin nani-tawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Amâ. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Amâ asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasâlan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Bilang mga parakasala, magdolok kita sa Amâ na nagpili ki Santa María na magin daing-digtang Inâ kan saiyang Akî, asin mamibi na panô nin pagsarig.

S — **Kagurangnan, hinanyoga an samong pamibi.**

- Tanganing an mga namamayo kan Simbahan dai nangad magpabayâ na makasarô ki Santa María sa pagpamibi asin sa paghagad kan saiyang tabang para sa mapangganang pag-utob kan saindang mga katongdan, ipamibi niato sa Kagurangnan. (S)

2. Tanganing siring ki Santa María, kita main makusog an boót asin danay na andam sa pag-utob kan katongdan na mamoot sa kapwa, orog na sa mga daing-sukat, ipamibi niato sa Kagurangnan. (S)
3. Tanganing sa tabang kan pamibi ni Santa María, madaog niato an karâtan, makahâwas sa kasâlan asin gibohon an satuyang hawak na maninigong eerokan para sa saiyang Aki, ipamibi niato sa Kagurangnan. (S)
4. Tanganing kita gabos magin mga agosan kan mamomoton na pangataman ni Jesus asin kan saiyang Inâ para sa mga naghehelang sa satuyang comunidad, ipamibi niato sa Kagurangnan. (S)
5. Tanganing an mga nagtalikod na sa kinâban magkamit nin kapahingaloan sa kahadean kan Diós kaiba ni Santa María, ipamibi niato sa Kagurangnan. (S)

P — Langitnon na Amâ, itinao mo samo si Santa María na samuyang Inâ asin aarogan, na magdanay na yaon sa samuyang buhay, sa tabang kan saiyang mga pamibi, buksan mo an samuyang puso para sa pagbâgong buhay. Huli ki Cristo samong Kagurangnan.

B — Amen.

LITURGIA KAN EUCARISTIA

Pagdolot (Tukaw)

(Sinasambit kun mayong Awit sa Pagdolot)

P — Inoomaw ka, Kagurangnan, Diós nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — Pag-omawon an Diós sagkod pa man.

P — Inoomaw ka, Kagurangnan, Diós nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — Pag-omawon an Diós sagkod pa man.

P — (Tindog) Magpamibi kamo, mga tugang: tanganing an sako asin an saindong atang maako man lugod kan Diós Amang makakamhan.

B — Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man

sa pakinabang niato asin kan bilog niyang banal na Simbahan.

Pamibi sa mga Dolot

P — Kagurangnan, kaugaying akoa an nakakaligtas na sacrificio, na dinodolot mi saimo sa solemnidad kan Inmaculada Concepcion ni Santa Maríang Virgen, asin warasan na siring na kami magpapahayag saiyang na ligtas sa gabos na digtâ nin kasâlan huli kan saimong naenot nang gracia, kami man, huli kan saiyang pamibi, makaligtas sa gabos na kasâlan. Huli ki Cristo samong Kagurangnan.

B — Amen.

Prefacio

An misterio ni María asin kan Simbahan.

P — An Kagurangnan mapasaindo.

B — Asin sa saimong Espiritu.

P — Lítaas an mga puso.

B — Initaas mi na sa Kagurangnan.

P — Magpasalamat kita sa Kagurangnan, satuyang Diós.

B — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Amâ, Diós na makakamhan na daing kasagkoran:

Ta linigtas mo an orog kapaladan na Virgen María sa gabos na digtâ kan pinaka-enot na kasâlan, tanganing sa saiyang na sinamnohan mo kan kapanoan kan saimong gracia, nag-andam ka kan maninigong Inâ para sa saimong Aki, asin tinandaan mo an kapinônan kan Simbahan, an saiyang magayon na Esposa, daing gusot o digtâ.

Ta an orog kamabining Virgen mangangaki nin lalaki, an daing salang Cordero na nagparâ kan samong mga salâ; asin binugtak mo siyang enot sa gabos na magin man sanang agihan nin gracia asin aarogan nin kabanalan para sa saimong banwaan.

Kaya kairiba kan mga koro nin mga Angeles nag-oomaw kami saimo, maogmang nagpapahayag nin pagtubod:

Gabos — Banal, Banal, Banal an Kagurangnan Diós ni mga hukbô. An langit asin dagâ pano kan Saimong kamurawayan. Hosanna sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia (Luhod)

P — Misterio kan Pagtubod.

B — An pagkagadan mo, Kagurangnan, ipinapamareta niato, an Pagkabuhay mo liwat ipinapahayag, sagkod na ika magdatong.

P — Huli saiyang, asin kaiba niya, asin sa saiyang, saimo Diós Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niato (Tindog)

P — Natukdoan kan mga ... :

Gabos — Ama niato, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niato an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos ...

B — Huli ta saimo an kahadean, asin an kapangyarihan, siring man an kamurawayan sa mga kapanahonan.

P — Jesu Cristong Kagurangnan ...

B — Amen.

Pagpahayag kan Katoninongan

P — An katoninongan kan Kagurangnan danay na mapasaindo.

B — Asin sa saimong espiritu.

P — Magpatinaraohan kamo nin katoninongan.

Cordero

B — Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: tawi kami nin katoninongan.

Pag-alok sa Pagcomunion (Luhod)

P — Uya an Cordero ...

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion

(Tindog)

(Sinambit kun mayong Awit sa Comunion)

María, mga mamuraway na bagay sinasabi dapít saimo, ta hale saimo nagsirang an saldang nin katanosan, si Cristo na satong Diós.

Pamibi Pakacomunion

P — Mamibi kita.

Kagurangnan samong Diós, an mga sacramento na samong inakô, magpaomay samo kan mga lugad kaidtong kasâlan, na sa kasâlan na ini, sa naiibang paagi, linigtas mo si Santa María sa daing-digtang Pagpangidam saiya. Huli ki Cristo samong Kagurangnan.

B — Amen.

Dangan, ipapamibi an Gawe nin Pagconsagra asin Pagdusay sa Inmaculada Concepcion, susog sa ipinapanongod kan Katiriponan kan mga Obispo sa Filipinas (CBCP). [Hilingon an Ordo 2023, p. 9]

RITO SA PAGT APOS

Solemneng Bendicion

P — An Kagurangnan mapa-saindo.

B — Asin sa saimong espiritu.

P — Magduko kamo sa pagbendicion.

An Diós na sa saiyang karahayan nagboót na tuboson an katawohan, huli kan pangaki kan paladan na Virgen María, pagkanigoon niyang warasan kamo kan saiyang bendicion.

B — Amen.

P — Asin danay asin minsan saen kamo makamate kan saiyang pag-ampon, na huli kaini nagkanigo kamong mag-ako kan kaglalang kan buhay.

B — Amen.

P — Asin kamo na ngonian na aldaw nagtiripon sa malodok na puso, mapa-saindo an mga balaog nin mga spiritual na kaogmahan asin mga langitnon na premio.

B — Amen.

P — Asin an bendicion kan Diós na makakamhan, Amâ, asin Akì, ✠ asin Espiritu Santo, maghilig asin magdanay saindo sagkod pa man.

B — Amen.

P — Lakaw kamo sa katoninongan ni Cristo.

B — Salamat sa Diós.

GAWÉ NIN PAGCONSAGRA ASIN PAGDUSAY SA INMACULADA CONCEPCION

susog sa original na texto hale sa Katiriponan kan mga Obispo sa Filipinas

Ipinapanongod na pangadyion ini sa gabos na mga Misa sa Solemnidad kan Inmaculada Concepcion ni Santa Mariang Virgen.

Minadolok kami sa saimong pangataman, O banal na Inâ kan Diós, sa pagsayod niamo kaining antifona na pinapamibi kan Simbahan ni Cristo sa halawig nang panahon, na ngonian samong pinapamibi giraray sa atubang mo, samong Inang Daing-digtâ. Kami na kabtang kan Hawak ni Cristo sa naciòn ngonian, minapamibi kaining Gawe nin Pagconsagra asin Pagdusay kun saen samong tinitipon an mga paglaom asin kahaditan kan mga Filipino, sa samong kasaysayan ngonian.

Inâ kan samong naciòn, minarokyaw kami sa tataramon na *Pueblo Amante de María*, an mga tawo na namomoot ki María. Nasasabotan mo an samong mga pagsakit asin paglaom. Ika na nakakamate bilang Inâ sa saimong mga aki, kan mga pakipaglaban kan karâtan asin karahayan, kan liwanag asin kadikolman, na nagpupurisaw samo ngonian.

Inâ kan samong banwaan, akoa an mga inagrangay niamong mga tinutulod kan Espiritu Santo, na isabi sa kararoman kan puso mo, kugosa nin may pagkamoot nin sarong Inâ asin surogoon kan Kagurangnan, an samong banwaan asin dagâ, na samong itinitiwala asin idinudusay saimo ngonian.

Huli ta kami naggad nagmamakulog sa dagânon asin langitnon na padumanan kan lambang sarô samo asin kan gabos sa samong banwaan. Minadolok kami sa saimong pangataman O Mahal na Inâ kan Diós, hare mo pagsayumahi an samong pag-arang asin pangangaipo. Sa mga pagsayuma sa kaangotan, pagkulog, asin pag-irival na nagbabaranga asin nagrurumpag sa samong naciòn huli sa mga kasâlan, agawon mo kami.

Sa mga kasâlan tumang sa buhay nin tawo poon sa kapinônan kaini, agawon mo kami. Sa pag-tumak kan dignidad kan mga akì nin Diós, agawon mo kami. Sa gabos na forma nin injusticia sa samong sociedad, agawon mo kami. Sa mga paglapas sa mga katugonan nin Diós, agawon mo kami. Sa kawâran nin pag-atid-atid kan marhay o maraot, agawon mo kami. Sa mga kasâlan tumang sa Espiritu Santo, agawon mo kami. (Sa naglalakop na pandemia asin mga kahelangan sa hawak man o sa kalag, agawon mo kami.)

Hinanyoga, O Inâ ni Cristo, O Inang Daing-digtâ, an mga pag-arang na panô nin paglaom asin pagsakit kan lambang sarô samo asin kan gabos sa samong naciòn. Tugotan mo na mamidbid giraray sa samong kasaysayan bilang naciòn an daing-sagkod na kapangyarihan kan Kaligtasan, an kapangyarihan kan maheherakon na pagkamoot. Rumpagon lugod kainian kapangyarihan kan kasâlan asin karâtan sa samo, asin pakamarahayon an samong mga conciencia. O María Inâ ni Jesus asin samong Inâ, an samong buhay asin kahamisan asin paglaom. Amen.

Palis sa Bikol ni Reb. P. Eric P. Bobis. May pagtugot kan Arzobispo kan Caceres, Revendisimo Rolando Octavus Joven Tria Tirona, OCD, DD. 03 Diciembre 2020, Memorial ni San Francisco Javier



sambanwá
GIYA SA PAGSAMBA KAN BANWAAN NIN DIOS



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archidiosis nin Caceres, sa pangengenot kan Caceres Commission on Communications asin Commission on Liturgy. Ciudad nin Naga, Pilipinas • 2021

